

*1497 Juli 15, Thaur*

*Herzog Erich von Braunschweig und seine Frau Katharina von Sachsen quittieren dem Zyprian von Niedertor den Erhalt von tausend Gulden Rheinisch aus einem Darlehen.*

Wir Erich von Gots gnaden Herzog zu Brawnsweyg vnd Lúnneberg etc. vnd Katherina geborn von Sachsen, sein eeliche gemahel, bekennen für vnns, vnnsere baidere erben vnd nachkomen daz vnns vnnsere besonnder lieber Ciprian von Nidernthor ritter zu Newhaws ein tausend gutter reinischer guldin, so er vnns auf sannt Jacobstag des heiligen zwelffbotten innhald eins schuldbrieffs vns desshalben gegeben, des datum stet ze Ynnsprugg am phinztag nach dem sonntag Letare in der vasten alles nechstuerschinen zu bezalen schuldig gewesen ist, ausgericht, bezalt vnd die on allen vnnsern costen vnd schaden zu vnnsern sichern handen vnd gewallt geantwort hat, damit vns yezo vnd hernach wol benuegt. Darauf sagen wir für vnns all vnnsere baidere erben vnd nachkomen den benannten von Nidernthor, sein erben vnd nachkomen solicher obberúrter tausend guldein gantz frey vn anspráchig, quit, ledig vnd los, wissenntlich in krafft diz brieffs. Wir haben auch auf solichs im den gemelten schuldbrief nach obberúrter bezalung vber vnd zu seinen hannden geantwort. Vnd des zu vrkund so haben wir vnnsere innsigel hie an disen brief henngen lassen. Geben auf Thawr an mittichen nach sannt Vlrichs tag, nach Cristi vnnsers lieben herren geburd vierzehenhundert vnd im sibendnewnzigisten jare.